

四庫全書

集部

欽定四庫全書

石倉歷代詩選卷三百九十二

明 曹學佺 編

明詩次集二十六

彭韶

送謝文祥御史謫南陵丞

零露一以墜
原野生微涼
金風轉蕭索
四壁寒吟蛩
夜長不能寐
攬衣起徬徨
仰視天宇濶
素月揚輝光
奄忽

浮雲馳肅肅雁南翔一啄諒易謀豈不足稻粱窮海壘
臣書籍爾遠見將羽毛尚摧落蒼黃未能忘云何抱孤
影悠悠歧路長願言隨陽歸以慰朝夕望

魏九淵太守送岑嘉州集書韻復之

岑嘉州真名汎生平浩氣橫清秋詞源瀕洞傾枚鄒春
江曉漲蛟龍浮從班解秩不復收從軍直到海西頭湖
沙三載踏駢驅長江萬里空悠悠間關西赴五馬侯郎
官御史青幕遊蜀嘉山水增清幽夜夜文光煥斗牛嘉

州千載知不憂遺文流落人重修當時炙手勢莫儔至
今寧有姓名留

與長男濬圖世科事

莫恨當年志未酬更思黽勉紹箕裘鷄窓獨掩槐花暮
蟾窟高攀桂子秋宦業成名存顯晦文章家數有源流
若能早立規模定方可終身事進修

寄愚菴陳冢宰

勒就功名上鼎彝乞骸三疏達金扉洪恩此日加宮保

鶴髮來年是古稀間結耆英尋舊侶新裁野服稱初衣
郡樓紫氣銷沉久喜見清風太宰歸

送鍾岳賢姪之教上海

吾家田舍少聞儒分派橫塘頗讀書伯子僊郎超美秩
季方名士得新除風生池畔芹香細雨過庭前草色舒
文教從容真可樂當毋倚席度居諸

送方宜約郎中還朝

督餉時聞有好音東人懷惠起謳吟千倉露積餘紅腐

萬竈烟浮散綠陰寵辱不驚書最績便宜頻上聲忠忱
及瓜忽報趨朝去歲早行看作傳霖

贈吳汝賢學士

南都佳麗正春風學士承恩出上宮鍾阜山光浮紫氣
秦淮樹色映房櫳詩吟真境無聲處人在金門大隱中
應念榆關持節者籌邊何日可收功

送鄭思亨淳安司訓

秋闈曾占一經魁分教名邦寵異才細雨侵堦春草合

輕風入樹杏花開講明禮樂收餘燼緒正文章淑後來
此地從前多俊傑儒僊又見陟蓬萊

送陳公甫還廣

白雲縹緲出林端盤礴回風欲雨難
歛却神功歸洞去故山依舊碧巔巔

王佐

題洛社耆英圖

洛陽山水多佳致春日遲遲景明媚
耆英樂此恣遨遊

古剎名園無不至
龐眉鶴髮金玉相
衣冠濟濟相輝光
功名事業付青史
解官林下同徜徉
翠陰深處雲屏敞
閒理絲桐寄清賞
桃花亂落紅雨飄
一派天風送遺響
雍容相與臨楸枰
晝長消此烟霞清
手談但適橘中樂
勝負寧為蝠燕爭
或來掃石題新句
笑撚吟髭覺幽趣
或來共閱無聲詩
清思滿懷無着處
觀泉策蹇興何多
長松落落蟠煙蘿
小橋水滑拖冰練
遠峯矗矗浮青螺
人生得志貴知止
脫屣如公曾有幾
爭知宦海多風波

何必栖栖戀金紫君不見香山九老人中僊卷舒與道
相周旋又不見急流勇退稱明哲士論錚然重風節吁
嗟世事能幾何朱顏轉眼雙髯皤會當仰止前修德樂
遊莫遣空蹉跎

送王宣樂先生秋滿歸西江

桐江八月西風急冠蓋紛紛送行客相看俱是異鄉身
滿目離愁禁不得君持教鐸今十霜繽紛桃李羅門墻
桷榱梁棟收時譽行將此績陳明光明光尚遠家林近

撥棹西還逐歸興
柯山雲散晚峯青
苔溪水落寒潭淨
到家正值黃花開
摧柑擊蠃羅尊疊
霞觴滿注為親壽
華堂頓覺移蓬萊
人生百歲貴行樂
何必拘拘戀名爵
由來宦海多風波
伊孰如君獨先覺
我來托交雖未深
多君意氣如南金
欲知去住兩相憶
明月一天千里心

題九鷺圖

江南五月薰風起
爛熳荷花映湖水
翩翩屬玉胡為來
結隊連拳艷香裏
縞衣鶴鶴明秋霜
高飛遠舉參翺翔

御風旋繞頻睇盼欲下不下仍徜徉回頭仰顧雲邊影
一聲叫斷波紋冷驚回葉底錦鱗潛喚破舟中漁夢醒
或來並宿垂楊磯困倚斜暉兩翼低水面風烟共明沒
湖邊景物初淒迷或來潛倚芙蓉立側身欲啄遊魚食
粉翅斜翻白練飛荷盤露走明珠滴止茲栖啄得其時
滿目紅芳良自怡不隨鷗鳥沙汀宿不逐鴛鴦蘆岸飛
有時直上青雲內鸞鳳為班鵷作對有時移入紫羅衣
能與皇家著榮貴嗟哉君子有九思貌此雪禽期自規

披圖拂拭一觀覽頓覺清風生羽儀

題中秋宴別卷贈楊文英應貢之京

三秋已半無炎暑皎月行空淨如洗主人是夜綺筵開
如在廣寒宮闕裏妙舞清歌樂未央翻翻桂子飄清香
銀蟾影落金樽酒露華涼滴紫羅裳脩脩輕吹搖庭竹
雲母屏間瑩如玉坐中急管間繁絃花底絳紗籠鳳燭
主人欲作朝天行會我賓朋陳別情以茲罄飲不辭酌
況值良宵對月明明月滿地瓊瑤色類子文光初奮跡

白壁離塵瑞影增青萍出匣寒芒溢酒酣為道行邊程
吳山路水蘄陽城虎拜玉階三策獻贏取青錢萬選名
人生得志無逾此肯學鷓鴣棲棘枳堯舜君民當此時
要使勲名昭太史

春江魚樂

春江水滑流寒玉碧樹籠烟暗江曲小舟撐出柳陰來
盪破粼粼鏡光綠漁翁喜得魚盈筐議向前村換醺醪
陶然共醉艷陽天杏花風暖推蓬宿

和江東黃謙咏梅韻

江南昨夜東風動
冰花半吐橫山洞
翠禽啼月雪初消
春光隱隱枝頭送
羅浮夢散暮雲平
寒溪淅淅泝漸聲
逋僊呵筆寫吟景
孤高風調誰能京

遊上清宮

解纜探奇勝
真覓舊蹤水簾晴
霰落丹竈暝雲籠
鸞鶴無方跨蓬壺
有路通一聲長嘯
罷身在洞天中

歎髭白

歷盡風霜苦髭鬚一旦皤青看頰下少白覺鏡中多不
為詩腸累其如酒病何功名成底事空自歎蹉跎

虎引子圖

嗟彼猛虎羣縱橫負嵎穴眈眈勁氣噴桓桓威武烈一
嘯風水號兩眸電光掣惟有父子心相從復相挈

遊絲

閑處偏多靜處稀飄揚無力望中微弱條織雨牽閨恨
斷縷迎風惹客衣低掛簷前紫落絮高颺天外繫斜暉

傷情最怕春歸去
網住桃花不與飛

新雁

颯颯涼颼起
素商橫斜幾陣
向南翔
寒依菰米
陂田熟
夜宿蘆花水
國涼
片影帶雲橫
朔漠數聲呼雨下
瀟湘
往來天北天南路
遙認長汀是故鄉

遊烏石山

百尺峰頭草樹齊
肩輿遙上白雲梯
一林秋景山如畫
滿地藤花徑欲迷
風引磬聲知寺近
霧連巖石覺天低

清遊自有無邊趣拄笏松陰聽鳥啼

和高思庵

七十年來鬢已皤掛冠神武欲如何傳家有子登龍去
高卧無人問字過宦海風波知己少故園松菊愜情多
人生莫惜十分飲須信光陰一擲梭

京邸別友

躍馬關河別故人雲山數點綰離情春風碧水思韓子
夜雨青燈病馬卿草色江空斟別酒煙光風細襯歸旌

故園明到如相問猶困劉蕢舊短檠

和夏方伯文闌中秋對月

坐對槐陰月色過碧空千頃溢金波為看此夕清光滿
不記中宵風露多丹桂開時香縹緲素鸞掀處影婆娑
蹇予舊是蟾宮客笑問嫦娥識面何

中秋無月

剛到中秋景即闌嫦娥羞澁倦飛鸞廣寒門掩霓裳歇
丹桂香銷玉兔寒美景已辜今夕賞清光動是隔年看

何當覓取王生管吹破重陰見玉盤

花封琴韻

公庭無事理瑤琴一曲陽春太古音
碧落霜清山鶴唳寒潭煙淨水龍吟
調同千古南薰譜響雜三秋午夜砧
單父當年成治化芳名贏得到于今

謝周序班叔理寫畫

多君為我寫江山珍重摩挲老眼看
五十年前同筆硯交情多在此圖間

題鸚鵡

為禽禽語是禽言何必聲聲學語論莫道性靈多巧舌
金籠深鎖度黃昏

上清宮留飲

羽僊邀我飲流霞不覺松梢日已斜鶴背洞簫歸路晚
一聲吹落碧桃花

題荊東林司成先生

紫翠叢中獨隱奇風霜飽歷燦東籬寄語柴桑老居士

好歸吟賞莫教遲

讀花藥詞

朝擁紅粧出大家
酣歌玉樹後庭花
誰知擒虎兵臨日
背井風寒泣麗華

宮怨

芙蓉帳冷減容光
愁倚薰籠懶着牀
寒氣逼人眠不得
鐘聲催月下迴廊

王鼎

分得然字贈龐黃門擢叅閩藩

鳳雛產龐氏文彩九苞鮮疏抗黃門重名高白壁連八閩歸化治兩浙入吟鞭不作春明怨臨岐自灑然

登泰山

與客登喬嶽肩輿煙靄中乾坤生氣盛今古仰心同勢判徐青遠川流汶泗通北瞻復南望雲樹兩濛濛

遊南巖和坐客韻

幾度相期遊此山偷閒方始遂盤桓山僧不慣遊賓客

野老還知謁縣官
隔葉比聞啼鳥好
朝陽行見起栖鸞
吾儕共沐恩波濶
謾倒金罍恣合歡

和總戎高德輝韻

皇圖鞏固如磐石
何事邊情日報來
小醜安施觀鼎鬲
長城終是挿天開
征西人望輪臺詔
直北誰當鎖鑰才
一別春明驚歲改
幾迴封事夢中裁

和尹太宰公歸田韻

藻鑑當年黃閣舊
杖藜今日白頭新
尊鱸適興非嫌貴

籬菊怡情可樂貧玉麈清談時對客錦囊佳句總驚人
茫茫宇宙知多少誰識東山屐底春

題賓月

到處恒存安樂窩終宵舉酒對嫦娥庾樓登罷情何限
袁渚遊來興更多天上有時還朏朏人間終是隔煙波
何如借得星槎便直入廣寒相踏歌

題筠谷

此君高勁更中虛嶰谷淇園是舊居月到草堂和影入

風清書屋與聲俱鷗鵠啼歇黃陵暮鸞鳳來栖盛世初
自是主人堪比德不栽桃李只栽渠

贈吳仲和之揭陽

秋風共折廣寒香春日同遊選佛場
駕鉞慚予先脫穎英豪羨子復飛黃
卽官暫試親民職妙手終須補衮裳
忠孝兩言期努力臨歧渾不動離觴

送黃門許啓衷使安南

交南欲上乞封辭正值天王嗣位時
使遣近臣諳典禮

袍加極品肅威儀庭幃綵拂青雲動浪拍旌搖白日歌
周爰民風勤米納回朝應有諫章隨

送總憲熊汝明之兩廣

皇朝職任大中丞簡命親承嶺表行道列五花新節鉞
胸藏數萬舊戎兵山迎風采蠻烟淨人樂耕耘蠶雨輕
文廣自從君去日更無邊報到春明

題三一居士為嘉興屠元明貳守作益其歷武

昌建昌太平不挈家故云

大郡名邦三歷敷居無家累一身強淵明自信為先世
李白何妨入醉鄉興味蕭條琴鶴對仁恩敷洽棣棠香
年來誰應循良詔懷劔如君滯遠方

送劉時雍致仕歸

汲黯忠良正著聲詎因私計動心旌東山松菊渾無恙
北闕恩波浩蕩明潞水扁舟函帶玉岳陽高閣挂冠纓
遙知舊隱生輝處草木因君亦得名

送趙天挺歸省兼壽野西先生

野西叢竹日平安鶯谷鷗汀恣結歡喜有鳳毛三釜養
寧須蟬蛻九還丹秋風解鱣催飛鳥冬日凋欄落舞鸞
壽越古稀登耄耋封從郎署進堂官

寓利津公館即壁間韻紀事

霜城東望接清流景物荒涼電後秋客裏不堪聞野哭
封章欲上歎無由

按李西涯文集云閩三留王先生以教諭封監察御
史卒于家其子鼎以狀來請公諱佐字廷用福州中

衛官籍年十二能詩治春秋得其秘要學者宗之天
順己卯舉鄉貢授桐廬縣學訓導陞鄒平教諭以鼎
成進士遂告老嘗自引古人云留餘祿以還朝廷留
餘福以遺子孫留餘巧以歸造化故自號為三留云
鼎為御史或言事過激先生輒遺書勵之曰汝職當
爾毋以我故有所顧慮其大者則論王越開邊封伯
尋褫安置仍謀起用及親藩誣詆守臣上繫之獄公
會疏極言一夕而宥舉朝縉紳皆為歡賀云因忤逆

瑾謫保昌知縣稍起同知憲僉瑾敗陞副都御史晉
右都御史乞歸卒贈工部尚書

黃鎬

題夏都憲墨菊

窮秋百草晦園籬淡無容惟餘霜下姿
英英吐新叢開樽愜幽賞慕此漉酒翁
晚節兩相高千古生華風

送蕭進士歸省

題名黃甲宴瓊筵百五人中最少年榮養纔分天府祿

乞歸端買越溪船
關山雲遶懷英舍
嶺嶠風吹祖逖鞭
想到重闈春已半
百花紅映舞衣鮮

送吳御史還朝

法星入夜動蒼旻
御史乘驄出要津
有脚陽春隨玉節
無聲膏雨逐朱輪
吏循郡邑澄清力
民樂閭閻撫字仁
最愛皂囊時入奏
天顏有喜直言臣

送朱大叅之任

除書高自九天來
井羨薇垣得俊才
公道喜從今日見

聲光知是昔年培紅亭綠酒隨宜酌近水遙山取次栽
此去重看宣德化一方民物樂春臺

魏冢宰公惠柑子致謝

未到元宵已得柑老坡心事亦何堪瓊瑤乏報詩空寫
指爪留香酒半酣楚澤此時同雅趣洞庭何日快清談
胸中飽却風霜味何事芭苴更少貪

偶阻風雨與江浦張同寅聯舟因作

兩年聯署紫薇堂未得從容共一觴為掃妖氛秋放棹

偶因風雨夜連牀雲昏海嶠天關遠水遶江臯客路長
判袂南津重回首白鷗飛盡岸茫茫

朝罷述懷錄呈寧憲長

雞鳴催辨覲天顏馬首燈籠喜並看物色未須陳二品
佩聲聊復壓三班近來才識需經濟老去功名在治安
遙憶五雲供應處春風回首隔重關

劉方伯邀遊風洞二首

石磴躋攀勢自尊騰身舉足到山門諸天清淨無過佛

三伏炎蒸不近人
宋相文詞存簡古
唐賢詩句愛清醇
開顏覽勝須傾倒
方伯交情孰與倫

朝宴虛堂晚未休
滿前風景快雙眸
好山萬疊濃如黛
新水一灣清似油
奉使情懷輸曠達
校文詩句費啁啾
興闌不記人扶醉
猶自題詩紀勝遊

別眉山余都憲陞辭回南京二首

客舍蕭蕭行李輕
寒風遠道送南征
離亭柳脆人初發
前路花殘酒獨傾
濟水迥添晴浪湧
淮山平接暮雲橫

交游三十年來好漸老何堪故舊情

曉日辭朝出禁垣馬前專勅奉明恩經營王賦推良吏
斟酌民情達至尊終歲賢勞緣體國暮年離別倍消魂
寒風凍雨金陵路松柏青青為掃門

賀大司徒殷公之任南都

寅亮天工在六卿銓衡地位即阿衡風雲律呂休徵應
沙汰江河徹底清逆旅殘春千里夢長安舊雨十年情
晨星落落良堪歎莫惜因風一寄聲

陪黎同寅遊大德宮

初上仙臺已出塵登樓更仰玉皇尊
平臨斗極瞻三殿俯瞰寰區見九門
晴雪欲移山入闥祥雲起捧日當軒
丹方有訣無人問高士來邀共舉樽

登留臺山

病起詩魔酷愛山一登山路便開顏
殘紅滿地春將老新綠當階意自閒
醉後恍疑塵世小年來彌覺宦途艱
回頭忽動鄉關思飛鳥長空未得還

夢中即景

魚龍掛雪衣銀河浪如級一瀉千里餘濤驚鬼神泣

夢中題同年董仲矩雪景

鶩餐水面霜人望天邊月水月一般清前山掛晴雪

題商文毅年兄墨竹

渭畝移來今幾時風霜歷盡有誰知虛心勁節凌雲表

占斷東南第一枝

黃澍

和林都憲待用南院書懷因寄

久欽高節出塵寰未獲摳衣函丈間
赤手曾扶元氣在素心能挽古風還
紀綱有道烏臺肅嘯咏無妨燕寢閒
夜夜神交接光霽與君原不隔關山

覽鏡髮有白者書寄楊同寅

年來事事負心期覽鏡俄驚鬢已絲
多病難消官府俸有懷常把大家詩
孤衾酒薄寒威峭萬瓦霜嚴曉色遲
笑拂征鞍歸路穩帝城雲樹正參差

良鄉道中遇吾閩進鄉錄者知楊同寅之子邁
獲雋即遣人馳報于通州比還承寄識喜詩

輒次韻

文獻聲華有自來如君門第幾人偕山川環拱靈多萃
簪笏蟬聯慶未涯又報科登賢子雋不勝歡動故人懷
稱觴樂事應非遠料得扁舟已過淮

寄楊同寅二首

寂寞荒村久駐旌天涯歲杪若為情山無美木豈初性

臺有黃金惟舊名病骨不禁詩癖苦幽居端令客魂清
何當了事歸公府共把新篇子細評

出處從前已熟籌浮沉寧肯混時流交情眼底濃于酒
宦况年來冷似秋孤枕因君生別夢殘燈為我照鄉愁
同寅甚喜成三益職業還期共勉修

和答許給事病起見示之作

幽齋孤榻深無塵春光欲暮還撩人嚶嚶黃鳥嚙枝竝
箇箇紫燕營巢新金莖誰解侍臣渴丹訣自認吾家真

奚為撫景重增慨
匡時祇愧虛經綸

余未識都憲林公偶于同寅楊恒叔處獲觀所

寄詩遂次韻奉寄

美人無地就蘭薰
想像清標愜素聞
是處好詞凌白雪
平生高誼薄層雲
囊中劒出吳歐冶
柱後冠仍漢惠文
幾向中天望南紀
太微星彩夜光分

還京朝見作

杪秋公出季冬還
晝夜馳驅鞍馬間
喜脫風塵依鳳闕

欣瞻日月近龍顏
朝參名忝金閨籍
拜舞身聯玉笋班
俯仰自慚無寸補
但歌天保祝南山

送林職方清戎之南都

眉間黃色已先占
此去公私喜得兼
天上恩波應獨厚
江東紙價莫須添
菜衣絢畫宜萊舞
淮酒宜春勝蜜甜
公暇詩成煩寄我
還容刻畫效無鹽

病中讀楊同寅贈錢憲副詩什因之有懷

文旌徧歷幾山河
歸橐珠光照夜多
風月喜君常有伴

簿書困我獨成疴焚書展卷還三沐擊節挑燈試一歌
却憶柏臺錢副憲無由叅侍恨如何

夜坐龍灣山館

宵鑰初封解署空一燈相對亂山中林藏虎豹人同處
溪入龍蛇路不通萬壑雪消銀錯落四簷冰墮玉丁東
閒情坐此良非惡贏得新詩幾首工

山廠病起偶成寄楊恒叔

風靜簾櫳吏散時綠陰初合晝遲遲閒情偏得文書妬

病思惟應枕簟知幾許幽懷空落魄一番春事又離披
遥思此際江南路梅雨蓬窓正可詩

夜坐良鄉公館次壁間舊作韻

岸幘槐庭露坐時銀河初轉漏聲遲馳驅敢說吾能慣
歷履想應天亦知病怯炎蒸朝未發牘嗔堆積夜還披
不如且作偷閒計洗盞張燈和舊詩

平谷道中二首

荒林寒日映郊墟驛路蒼生送使車巖壑空疎秋燒後

人家蕭索晚炊餘村田近水多沙礫野樹經霜半櫟櫟
却憶吾閩風景好此心端欲賦歸歟

不嫌雙鬢冒風塵衆責都緣萃一身詩句獨凌燕嶠雪
夢魂長遶越溪尊自慚吏事平生拙安得民風太古醇
回首帝城三百里擬將衷悃達楓宸

遵化道中

落日西風鼓角悲羸驂猶未脫征羈青山是處有奇狀
黃葉滿林無秀枝十月時光驚慘淡一年蹤跡歎支離

旬宣此日長城下橫槊何人為賦詩

山廠漫興寄楊同寅

夜來飛夢墮滄江曉起詩魔未易降天濶忽看歸鶴杳
渚清遙見浴鳬雙雲移山色侵羅幌風遞花香拂玉缸
為問騷壇諸作者許誰來往附名邦

公餘閒坐綠莎廳對案峯巒晚更青往事十年心尚醉
故鄉千里夢初醒人家巧趁山坳勢詩句工排月露形
繫著浮名未歸去幾回慚愧草堂靈

黃湜

遊中山寺

一壑風煙醉眼賒，尋幽偶爾過僧家。
危岑古佛苔侵座，複徑人稀棘碍車。
林木冬深無片葉，鐘樓日暮有羣鴉。
茲遊未盡粗豪興，聊寫新詩紀歲華。

山齋偶成

坐愛溪山可結廬，病軀空復歎居諸。
風情聊以供詩句，事業何須答簿書。
幾許秋成霖潦後，百千心緒醉醒餘。


平生自信逢迎懶，直道于今有孰如。

靜處沉思動處機，乾坤落落壯心違。誰能與物原無競，
我拙謀身自覺非。半榻青山吟夢遠，一燈殘雨故人稀。
牀頭剩得餘樽在，夜起呼童煮蕨薇。

閒來移榻看山光，蒼翠高低下夕陽。疎柳一蟬催暝色，
晚花雙蝶管餘香。廢吟正坐忙酬債，判飲從教醉是鄉。
高枕北窓非失計，擬將身世等羲皇。

和許司訓見寄作

曾共聯詩坐小齋別來音問隔重涯
碧天明月將清夢黃葉西風惱壯懷
脩職肯隨流俗混立心期與古人脩
相思無限寅恭意何日還都一笑諧



石倉歷代詩選卷三百九十二

欽定四庫全書

集部

石倉歷代詩選卷三百九十三

六

詳校官編修

臣謝振定

侍讀臣孫球覆勘

總校官進士臣朱 鈐

校對官檢討臣李學錦

謄錄監生臣陸紹臺

欽定四庫全書

石倉歷代詩選卷三百九十三

明 曹學佺 編

明詩次集二十七

陳焯

題畫

我聞道士張復陽手持鸞筆走四方
長安公卿爭得之
白雲碧水青天長
月洲恍恍佛此家
數一覽景趣神飛揚

秀拔老幹蒼龍起下瞰溪壑何茫茫兩翁對坐葛天氏
陋窺晉漢談虞唐輕風南來吹短髮水花弄影浮巾裳
蹇予落魄桐山下一生祇愛王維莊醉來揮毫為君寫
晚山秋雨生茆堂

登棲雲樓偶成

長空浮雲走白日竹杖芒鞋恣登歷拂衣長嘯猿鳥驚
拍手與天應咫尺山中一室茅可誅科頭鼓腹歌唐虞
野花十月爛如錦溪鯽霜寒肥似鱸閒經石澗坐來久

細拾松花釀新酒靜調綠綺和流泉忘却黃金印如斗
我家兄弟隣庄遊三杯浩氣凌高秋揮毫金聲擲地起
也能寄我棲雲樓

閒中誦天台方希直先生寄貧之作

朝荷東臯鋤暮返東臯屐町畦雨足菰葑肥溪塢秋深
梨棗實人笑貧者不求仕貧者笑人無遠慮世間萬事
等浮雲蘿月松風高卧去君不見金谷園又不見平泉
庄一卉一石誰主張李倫歌舞地至今人牧羊

題蒙菴兄家藏范寬春景

平生愛書更愛畫
輞川夢寐王維寫
雙瞳忽睹范生圖
蒙菴笑比連城價
高峰秀出廬與嵩
東風吹綠花茸茸
重岡疊嶂幾迴伏
怪石絕澗相奔奔
春巍我梵刹倚空表
俯視滄溟一杯小
古苔半沒石逕紆
野竹斜籠翠雲杳
蹇驢散步者何人
芒鞋藜杖青綸巾
捫蘿陟峻豁真趣
煮茗談空逢暮春
鬼工擘斷中峰路
桑柘陰連不知處
幾家老穉不出門
啄木聲殘庭外樹
春泉百道衝石橋

徵君書屋臨山椒學成不上千時策谷口鹿門甘寂寥
我題此景神飛越便欲溪頭弄明月誰能置我高堂中
萬斛洪濤噴晴雪

山庄偶成

羣山霜老楓葉紅幾家籬落山之東黃雲收盡牛方卧
廢井沒泉苔半封伊人長笑倚筇竹緩步回循小逕曲
石毛亂簇蟹眼醒野篠偏藏鳥聲續晚煙隔嶺梵宇遙
老僧入靜居山椒我欲從之問真訣斷橋流水風蕭蕭

次杜少陵野望客亭詩

衡門開太早野水共雲陰古寺楓林靜斷橋寒蘚深詩
翁閒得得世態自沈沈最苦蟬聲急山空風滿林

又

草深秋雨後亭少四窓風客散榕橋外人閒橘園中驅
牛看穉子荷鍾話衰翁三十年前事愁多兩鬢蓬

次南山楊先生韻

謾說攀龍我向難幾年搏虎走危巒千尋翠壁煙霞老

十二瓊樓風雪寒海外白波流去急山中綠野到來寬
眼前得失渾如夢輸却商巖一局閒

又

天恩乞得買歸艤高築南山啟八窓北海閒看雲片片
春山相對鳥雙雙竹泉引玉敲茶臼松葉飄香墮酒缸
見說大家肩李杜詩魔久矣為君降

林翠庭惠丹荔兼教以詩次韻

草堂獨坐轉成癡秋泛寒江尚有期病肺伏來全避酒

看山雨至似催詩養魚池小添新水種竹墻低露舊枝
記得翠庭曾別酒月明中夜費相思

塢峰高處暮雲遮七里文章閑閱家清泛蘭橈江曲折
醉眠松榻月橫斜詩成粉筆題霜管雲靜天空墮露花
為倚冰盤薦珍菓清香無限沁衰牙

東楊覺非先生

捨舟來問覺非居四圍清光滿座隅西峽潮回江似帶
紫臺山繞路還珠樽留芳席鷗盟狎詩寫遙空雁影孤

聞說南山楊老守近來清響逼歐蘓

酌陳山人家

白日長空一鳥飛晚雲歸去石無衣何人清世登台鼎
老我空山採薺薇酒醉解冠眠軟草詩成散髮對斜暉
新寧有客梅溪裔瀟灑高懷共息機

小酌限韻

席上佳賓兩復三東風花柳滿溪南野禽啼樹詩初就
綠蟻浮樽酒正酣密竹進牆新露粉小池通澗乍拖藍

箇中個儻曹劉會未許紅塵半點參

獨坐感懷

山中習靜類陶潛況是無官病態兼
竹屋蕭疎多受月
藜羹清滑少加鹽
抱琴遠客樽常倒
問字何人燭屢添
更有餘情消不得
小橋輕策屐苔粘

步園感興

少壯浮名老大灰
紅塵無夢到金臺
四時好景憑詩卷
千種閒愁仗酒杯
桃李陰連同客坐
町畦翠滿課童栽

青山笑我年年住野鶴林猿不用猜

夢遊鼓山

大江千頃浪花層
巖崩峰高擬一登
夜靜林重樓閣隱
春深雲暖海天澄
敲鐘分粥僧初定
刻燭題詩我也能
欲借東風吹兩腋
夜來清夢紀遊曾

晝眠

日午空山人悄然
清風石榻當窓眠
老松水鶴護巢立
暖漲溪魚遊藻牽
去去幾家臺嶺下
亭亭僧舍古巖邊

摩挲睡眼啜新茗不數何曾食萬錢

野酌

青山遠近白雲層與客攜琴此日登
入塢殘梅初著雨懸崖老木舊添藤
詩腸已藉靈泉潤野簌何須俗品增
取醉漫留雙短屐清樽對月笑吾曾

漫興寄友人

青山誰識隱君扉寂寞茅堂落葉稀
慣覩兒童驅犢去不知冠蓋買山歸
白鷺浴水閒牽藻沙鳥窺魚晚上磯

老我不堪秋夜泛賡酬莫訝與君違

福海庵

遙看竹院好尋僧石壁題詩記此曾
鳥啄花枝春已半
馬踏苔徑路猶層茫茫世事歸浮夢
寂寂禪心對古燈
久解塵纓懷抱濶蓬萊高處不須登

與域娃二弟夜過潮音閣

野火燒空空欲然晚雲猶挂碧山巔
良宵共步清溪月
高閣誰敲石磬煙老眼模糊還自嘆
交情寥落不如前

獨憐池草春無恙何似當年謝惠連

寄友人

曾憶洪江江上時
知心零落負佳期
春風舞袖何人酒
夜月登樓獨客詩
老矣乾坤雙眼在
悠哉歲月二毛知
佳章遠寄情如舊
一度開緘一度思

燈下和韻

老態迂疎未可移
寸心真與故人期
寒梅冷沁詩魂好
翠竹輕搖客夢遲
捐拙火殘嫌僕懶
經書塵滿笑兒癡

坐來深夜間惆悵剝啄誰家巧弄棋

和通甥韻

近來捉筆眼昏花到處青山映畫家
夢裏乾坤真是幻
閒中詩酒未為賒
流鶯度竹調新語
倦鳥歸林帶夕霞
可笑遜翁無箇事
水邊松下一甌茶

閒看溪鱗弄水花
小溪東畔是田家
詩翁卧石全成懶
野老攜壺未足賒
雲暗山腰朝作雨
日籠木杪晚成霞
醕頭從醉三千石
輸却盧仝七碗茶

徑邊風竹水邊花半是畝田半隱家乍斷石橋攀險渡
將沽村醞倩人賒風翻芋葉傾團露雨洗溪毛落晚霞
可是豪吟猶未了怪來幽鳥弄山茶

孟秋夜酌娃弟承恩堂

老年兄弟惜情深一接桐山思不禁共賞星河今夕景
重論詩酒百年心盆荷擎露全舒葉庭竹梳風半轉陰
我到草堂東漸白細磨端石寫微吟

菊月八日夜起偶成

往事縈懷底足嗟晚風吹夢上皇家青山獨榻無雲影
白露空庭有菊花干祿榮華惟畫餅悟真虛誕亦殮霞
細思長作秋江會且覓鱸魚上釣槎

中秋後一日

陰雲捲盡月華流獨坐中庭爽氣浮老我不禁三伏暑
可人遙送一天秋謾言吳下思萼樂擬待風前落帽遊
且向東林高處望醉吟消却世間憂

閩俗少壯賀誕晨設酒作樂非古人意小孫到

桐山苦請余出拜賀張席會族人以詩拒之
半生心緒老成灰棲遯桐山片石隈明日生晨先淚墮
重陽佳節強懷開雙親遺訓留紳珮二子英魂翳草萊
最是傷心千載恨西風落木總堪哀

江上晨梳

六十年來世事疎青山草屋野人居風吹短髮梳難整
鶴過閒身可得如病久到來尋舊藥眼昏歸去掩殘書
交遊四海誰知已大半凋零歎逝餘

余桐山草堂與蒙菴弟娃密邇每登臨觴詠情
洽如也蒙菴忽有兩浙之行絕句送之

故國捧除書相親復相送雲水浩無邊孤月隨飛夢
汝去越嶺高我卧桐山老兩地重相思碧波動芳草

山居岑寂有索草書者漫作二絕

細竹八九箇桐花千萬枝坐觀山色近覓紙便題詩
竹屋草代瓦決渠泉繞池客來無所問取醉更何之

為人題翎毛

古楊葉如繪下拂清波淺珍禽炫羽毛采采春風染

右鳬

江草草已長微颺吹綠漪物情本自適偏入少陵詩

鴛鴦

虬枝翻老圃下有雙錦衣曾籠貢天子刷羽依晴暉

錦雞

秋老澤國寒稻梁資啄食豈不懷同心天高整孤翼

右鴈

題輿姪畫屏

古寺松聲晚荷亭月色新我知浣花者不是踏春人
草屋斜連地松陰舊蔭橋讀書欲匡世能解把琴招
雪花大如掌茅屋深似年對言一樽酒牆角梅花妍

為阜山主人草書

山中一草屋常與雲相親野水碧千頃漁舟來問津

戲書

花殘春盡草如茵茅屋閒行有幾人啼鳥數聲山寂寂
不知長路柳條新

攬秀樓

何年構此山之東百杯相對山花紅桐山居士老解飲
何當置我新樓中

寄介菴病中

遠道何由惠海南不堪歸興滿松杉亦知三月當三日
花鳥餘情到草菴

九月八日值雨

五日十日天氣清故故重九陰雲生隣家貰得一壺酒
恐負明朝花下行

題畫屏

雪漫江天萬木中一間茅屋覆詩翁何人醉醒梅花月

踏徧寒山路幾重

憶節庵弟

湖閣風多水弄紋
倚闌趁晚看鷗羣
何人日日攜清醞
留與栖雲試一醺

憶介菴弟

昨夜南風捲白雲
小樓疎雨和泉聞
不知新構東窓下
一種清涼與客分

登怡山石

峭壁凌空欲墮江東來劣窮勢堪降紫芝瑤草何人採
目送長空鳥一雙

陳淳

送蒙菴僉憲弟慶賀之京

世道嗟險夷浮生類飄葉不沾矯激名直秉清勁節趾
美在克承餘休本能積余家有弟賢臬臺著殊績茲行
覲九重衆口稱嘖嘖拚倒雙玉瓶丈夫不云別

山寓懷歸

牀頭流水白雲間
匝耳松濤徹骨寒
縱有野人相對飲
杏花春雨滿前山

沙平茶話

海北閩南兩地賒
肩輿直上楚天涯
逢人再問雲深處
一犬黃昏吠落花

陳燦

感懷

雨時溪水濁
雨歇溪水清
我來玩清泚
適值風雨晴
冷

然啟水鑑洞燭萬物情因呼孺子前誰為歌濯纓

其二

薄暝松蘿陰開簾見新月皎皎白玉蟾迢迢廣寒闕靈
籟息天衢浮雲向空沒散髮行清光微吟了未輟尚憶
同心人相看隔秦越

和遜菴東臯述懷

落花飛雨香春潭啼鶯乳燕催儂鏡縈煙細草芳氤氳
錦鋪一架薔薇酣桑餘條羽供吳蠶陰敷百兩千歲楠

元龍韜耀心不貪作亭面水窮幽探新詩每與阿戎談
鏗金戛玉聲喃喃謝庭況有真奇男羣書強記事多諳
銜杯草聖樂且耽揮毫落筆書雲藍寄余環堵誦再三
珠璣唾落令人慙嗟余積忝不盈甌抱膝長吟心更堪
清溪滌迴白石菴芝蘭舊植風露含芙蓉倒浸浮煙嵐
星河滅沒天影涵軒軒渴睡希圖南短衣破帽輕肥甘
疏畦纈翠香滿籃洞庭酒熟留霜柑半生未遂趨朝參
也沾聖化仁恩覃

閒居

卜築卧青山浮塵事不關
虛庭巖石秀小圃水煙閒
倚杖看雲立吟詩踏月還
陶然天壤外何必慕商顏

寄遜菴兄山居

遜叟吟詩酷愛僧詩成良夜獨篝燈
白蓮社裏難忘酒西華山中任曲肱
倦鳥却歸天萬里奔鯨曾破浪千層
春風羸與田家樂醉捧豚肩祝歲登

述懷次前韻

已覺頭顱似老僧，衰遲還熱讀書燈。
消愁每辦一杯酒，治病難逢三折肱。
客夢易醒春雨裏，詩懷遥寄暮雲層。
漢陰抱甕雖云拙，猶勝孜孜壟斷登。

送蒙菴之浙江

霜臺持憲客許國，百年身馬踏閩關。
路鶯花舊日春。

又

君趨鸞鳳羣，我牧牛羊道。
別去各天涯，愁心寄芳草。

石倉歷代詩選卷三百九十三

充國用下以慰民望願言樹佳政永俾休聲揚

送邵讓秀才復學

送子都門去為子重延佇往來衝風塵此心良獨苦嗟
彼汗血駒逸足非無取不與孫陽知棄置欲誰語于今
事已白坦然無齟齬否泰互相仍伸屈無定所不見秋
天鶚一旦摧毛羽行看六翮齊雲衢任飛翥

贈司訓黃文光擢重慶府二守

朝來雨初霽相送出都城殷勤一杯酒不盡此離情多

欽定四庫全書

石倉歷代詩選卷三百九十四

明 曹學佺 編

明詩次集二十八

徐 貫

贈曾亞卿提督易州廠

懿哉廟廊具有如珪與璋昔為太僕長今我同官良送
君都門道馬首雲蒼蒼枝柯堪采伐毋使根株傷上以

贈較文學正王隆別

閩藩大比期天香發桂枝多士紛紛濟選擇藉主司有
若鑑之明妍媸詎能欺有若衡之平銖兩詎能違三試
叶至公得士人共推芋原秋欲暮涼風吹羅衣酒盡各
分袂雲樹兩依依

方山歸鶴

前山如屏幃華表相屹立我聞丁令威化鶴有仙跡此
事已千載渺茫亦難即而翁不可見悵望雲飛翼何日

君富文學表表人中英九年持教鐸兩度司文衡超遷
黃堂去越此承恩榮蜀道詎云遠別駕良不輕老穉多
瘡痍引領望行旌文翁有遺化寥寥誰復行

與雪厓航上人

厓石倚層空積雪凜寒玉禪林寂無諠悠然恣遐矚意
適超混茫情閒遺結束俯仰宇宙間定靜了無欲交遊
多名勝往還賦篇牘邂逅一清談已失塵萬斛長嘯天
風來隔窻動修竹

復歸來畢竟無消息徒倚懷感傷衷情浩無極

贈徐特俊任吉了巡簡

我從閩中來子向閩中去客裏送客行茫然動情緒關
河雁影寒野店雞聲曙莆陽文獻地風塵杳無處到日
春正和榕陰滿庭樹

仙居書屋為商懋衡先生作

結廬在幽境瀟灑遠蹄輪誰去蓬萊島迥在弱水濱開
窗泉瑩澈當戶山嶙峋中貯萬卷書奎光燭蒼旻于焉

教諸子古訓良具陳聖賢究在目千載如相親桂林有
喬枝溟海無涸鱗接武佐明主非徒席上珍

贈翰林修撰李賓之省祭還長沙

春風動瓊島玉河泮流澌詰朝拜休命得賜湖南歸冠
蓋紛如雲樽酒相與辭回首雙龍闕欲行復遲遲白日
昭文繡青春侍彩衣殷勤展丘壠喬梓增光輝懿哉丹
山鳳瑞我明聖時母為戀故林早向朝陽飛

釣臺

兩石屹立白雲裏先生高卧堅不起故人天上握乾符
幣聘殷勤亦徒爾紛紛誰不附飛龍獨把魚竿釣煙水
一朝赴召便歸來空使客星占太史

題蘭

我家住近東山麓清露蘭叢如膏沐好風披拂來深林
香氣襲人端可掬我今游宦已多年回首故山想芳躅
可堪原野草連天蒿艾蓬蕭滿人目

題華陽寺石洞

自從太古開石室神功巧設非人力氣通滄海六月寒
風雷不動雲常濕我來偶爾憇煩襟頓覺清風生兩腋
便欲偕鶴凌紫虛奈此蒼生未蘇息

邵武經高坡嶺

幽逕穿林過渾如洞裏行蕭森無日色滴瀝有泉聲古
木千章聳長藤百尺縈肩輿出山口回首白雲橫

歸化道中偶風雨有作

蒼嶺鬱岩堯行行路轉遙沿厓山石滑夾道樹枝交細

雨沾狂蓋寒風薄敝袍關情民事切跋履敢辭勞

耕樂軒

託迹依農業悠然愜隱情石田春雨足茅舍午風輕莘
野懷伊尹南陽憶孔明寥寥千載下誰復繼芳聲

贈陸潤夫任桂林通判

京國論交地都亭送別時遐方民待久故邑馬行遲晝
靜蠻煙息春深化日熙循良應不忝萬里慰相知

贈高橋巡簡吳廷顯

樽酒長亭別西風雨乍晴
蓼花明晚色蘆葉帶秋聲
里巷門虛設山村犬不驚
懸知公事簡吟笑有餘情

贈張世禎別

故人成久別邂逅客都城
夜雨方論舊春風又送行
鄉關頻入夢雲樹遠含情
迢遞清溪上相思對月明

贈建德朱崧任南昌司訓

馳驅催別思飛旆出都城
潞渚孤帆遠洪厓古樹平
菁莪歌小雅木鐸振希聲
門下握衣者彬彬總有成

三月十九日同上虞陳若無飲偶成

西風尋舊約佳釀復新開微雨簷前歇清風席上來祇
憑文字飲不用管絃催暝色起山際留連未肯回

和張憲長贈吳都憲致仕詩

報國丹心尚未酬忽聞優詔許歸休一樽綠酒長亭暮
三徑黃花老圃秋明月有情還我共浮雲無計為君留
扁舟浩蕩乾坤裏笑濯塵纓萬里流

聞胡司空附郭成新居賦此以寄

年來高卧白雲鄉
附郭新成綠野堂
一代功名昭汗簡
百年心事付滄浪
夢回殿闕層霄迥
興在山林清晝長
三徑蕭然無箇事
黃花老圃有餘香

寄長兄廷傑

赤石山前送我船
分携不覺又經年
夢回誰道故鄉遠
情到那堪別思懸
遼海關山明夜月
清溪桑梓帶寒煙
自慚叨受長城寄
姜被何時得再連

遊香山偶成

矗矗峰巒侵碧漢層層梵宇出紅塵松梢月挂上方曉
山頂花飛下界春一帶烟波爭入望半空雲鶴與為隣
我來不盡登臨興又逐東風覲紫宸

題梅軒

繞屋寒芳絕點塵笑看殘雪挽回春任渠時態姿容好
可似平生節操真夢入羅浮香更遠詩成東閣興偏新
吳公山下清如許不減西湖放鶴人

贈袁魚典史吳仕明

客舍秋來多別思公家事了是歸期西風古渡帆飛處
落日寒汀雁下時蓮幕帶將新雨露花村爭迓舊旌麾
殷勤盡力蘇民瘼當道何愁不薦推

功德寺沐浴口號

陰陰樹色暗溪橋滿目春光可自驕林外風清山靄散
湖邊日暖水痕消鶯啼弱柳如相喚鶴舞長松不用招
回首鳳城三十里肩輿來往亦飛遙

寄雲峰吳先生

獨向明時早拂衣急流勇退古來稀朝雲作雨還山去
暮鳥投林背客飛南畝秋深香稻熟西塘春暖錦鱗肥
黃金臺畔頻回首迢遞雲峰送落暉

贈蒙城令方先生淵還淳安

引年便欲拂塵衣促駕都門賦式微故里遙知三徑在
清時今見一人歸頻過石硤尋書院閒到嚴灘上釣磯
龜鶴山前春正好滿川花柳映柴扉

贈馬時宜下第還鄉

三疊陽關對酒歌相看無奈別離何題橋共擬追司馬
獻玉誰知泣卞和野水煙波歸路遠故園花竹樂情多
京華更有青雲約回首東風聽珮珂

壽桐江趙翁八句

身遊泮水詠菁莪晚着烏紗耀薜蘿聖世已甘嚴瀨隱
高年未許絳人過青山對酒春長在彩服盈庭樂更多
遠寄新詩為君壽請看銅狄幾摩挲

送人省親歸淮安

東風搖曳柳依稀有客都門賦式微題柱未酬司馬志
還家且着老萊衣白雲千里關情切錦鯉三春入饌肥
佇看亨衢堪騁步一鞭忙着莫相違

和都憲遊尹山韻

梵宇蕭蕭山外山欲窮幽計未能閒千尋拔地青峰聳
一道沿厓碧澗灣古木雨晴猿正挂長林煙暝鶴初還
萬緣點破都成幻不在尋常色相間

恭諗捧表上京寮屬追餞于劔浦驛座中分得

齊字

甌閩北去草萋萋滿道輕風趁馬蹄萬里客程看日近
九重皇壽與天齊驛亭月落雞聲早江浦雲深雁影迷
天上故人還惜別草堂應續舊時題

贈方旭陳任順潮驛宰

親捧除書出禁城一官新向嶺南行蒹葭浙澀雨初歇
楊柳依稀風乍晴地僻應知來使少潮平偏覺過帆輕
驛亭盡靜無餘事翻笑通衢苦送迎

挽致政太常卿陳贄

解組歸來未十秋，已將塵事付浮漚。
朝廷此日思遺老，洛社何人續舊遊。
菊逕就荒秋雨冷，草堂長掩暮雲愁。
文名不與身俱沒，江漢滔滔萬古流。

挽竹坡翁為都御史汪浩父

竹坡人去幾經年，見竹令人益愴然。
龍蓋已閒登嶺屐，荷田猶泊泛湖船。
鳳毛乍落秋風外，馬鬣空餘夕照邊。
今日朝廷多雨露，恩光還擬賁重泉。

悼妻

合卺于今十六霜
白雲流水意茫茫
浮生堪歎春秋短
大夢那知歲月長
愁對孤燈懸幃幙
忍開遺篋簡衣裳
歸來最是傷心處
塵滿空房月滿梁

燕山樵歌

白雲最深處
時有伐木聲
長歌互相答
澹然忘世情

偶成

寒夜獨凭闌
徘徊看明月
如何咫尺間
故人相隔絕

題畫為王元長作

落日秋林下高談且自由煙波浩無極閒却濟川舟

次朱文公先生權歌韻

一曲寒流權小船嵐光巖影漾前川幔亭宴罷羣仙散
不見虹橋空紫煙

二曲娉婷玉作峰月懸粧鏡若為容天然不着鉛華色
煙抹雲鬟翠黛重

四曲擎天聳雨巖瓊葩瑤草色穆穆我來不見金鷄唱

惟有寒蟾照碧潭

偶成

客邸光陰去若飛
冬衣不覺換春衣
危樓徧倚情無限
幾點征鴻叫落暉

太寧龍湖道中紀事

沿途白水通碧澗
隔溪赤壁倚青天
人家多住深林畔
遙見山隈幾處煙

蒜嶺驛別張序班

驛路相逢又相別客邊送客若為情東風也解離人意
故遣飛花遶旂旌

寄雲峰吳先生

野迳深幽市轉賒紅塵不到足煙霞遙知此日雲峰下
笑看寒梅樹樹花

大音寥莫正聲希世俗滔滔獨掩扉天下蒼生皆赤子
阿衡不作與誰歸

贈藍溪吳經入南鑑

同門諸友多登第雲路嗟君後着鞭誰識豐城流落劍
龍光遙射斗牛邊

贈桐江孫仲文

紛紛名利邈難羈又逐冥鴻萬里歸此去桐江看弔古
何人重上釣魚磯

晴州釣者為程尚書賦

玉几諸峰映碧川浴鷗飛鷺各悠然主人起慰蒼生望
猶夢溪頭理釣船

二月都亭即事

草色連階映綠苔
東風獨處不須栽
時人要得春光好
還得名花幾樹開

題竹

書窗謾對翠琅玕
偏喜真心耐歲寒
怪底此君解醫俗
清標瀟灑拂雲端

石倉歷代詩選卷三百九十四

欽定四庫全書

石倉歷代詩選卷三百九十五

明 曹學佺 編

明詩次集二十九

謝 鐸

雜詩

大化何綢繆四時互更代動植各有生種種自成類美
矣牛山木苦為斧斤害牛羊復踐之日夕就荒穢賴此

生意深保之方未艾

其二

浮雲無定蹤悠悠自來去本是空中生不向空中住
富貴果何物得之亦偶遇云何擾擾徒日夕勞念慮東陵
舊時園青青草盈路

題菜送林貴實謝病還莆田

東曹豈不榮促刺如窘步秋風一夜生吳中是歸路淒
涼遼海東白首公孫度揮鋤瓦礫間黃金不曾顧古人

重食菜百事皆可作送君歸去來日涉園中趣

西隣婦

西隣少婦東隣女夜夜當窻泣機杼今年養蠶不作絲
去年桑老無新枝七十老翁衣懸鶉皮肉凍死手脚皴
年年唱名給官帛尺寸從來不上身於乎辛苦輸官妾
之職牆下有桑妾自植妾身敢怨當窻織

短歌行

青青楊柳枝秋來不禁吹葺葺路傍草斬艾不得老昨

日欣欣笑語同今朝掩面啼東風乃知百年果倏忽作
善休言待明日問君北邙山下遊朽骨何曾多白頭富
貴同歸一丘土誰向身前問歌舞

苦雨歎

長安陰雨十日多傾牆敗屋流洪波男奔女走出無所
道路相看作訛語東隣西舍煙火空青蛙滿竈生蛇蟲
春來五月全不雨夏麥秋田皆赤土城中米價十倍高
斗水一錢人憚勞

天台山

天台山高不極山中去天不咫尺台星下射扶桑赤羽
旗颯爽招不得至今傳者神仙宅君不見周當盛時生
甫申峻極者嶽能降神天台山高不極作鎮東南比天
脊屹立乾坤自開闢

重脩黃樓歌

澶淵決彭城沒城上水頭高丈八誰哉誓與城存亡百
萬生靈命如髮近聞再決古汴州宵衣重起宣房憂預

防豈合先下流厭勝且復脩黃樓黃樓高洪河縮鼃鼃
遠避蛟龍伏誤疑砥柱西極天坐閱帆檣東走陸君不
見桓山墓戲馬臺英雄富貴安在哉落日淒風野草白
辦香獨上黃樓來

秋晴

暑雨兩經月秋風忽報晴今朝出東郭何處望西成水
國雌蜺動雲霄哀雁鳴相逢江上使猶道未休征

石鐘山

乾坤遺此怪今古費多評萬籟自生聽雙鐘誰所名問
山元不語叩石竟何情未識孤舟月能窮半夜聲

次韻黃世顯戊子元日

得歲頻驚我傳杯欲讓人翻思前日事多愧百年身紫
閣醉中曉青山夢裏春風塵雙倦眼歷歷怕逢新

奉和十五叔父下第金陵留別詩韻

千里念歧路十年成別離如何秋後信猶是夢中思舊
棠留書卷新愁上酒卮雲山看不盡獨立日西時

送賀克恭還遼東

送君從此別遼海隔風塵歸去身仍在相看道未貧蕭
條環堵病追遞洛陽春道上逢沮溺驅車莫問津

次韻奉待四叔父

書傳能到日心苦未逢時不語對歧路有懷如亂絲十
年猶是別百歲若為期昨日南征雁還家報已遲

晚過靜海宿流河驛

落日風初靜交河水正流居人不知姓行客且停舟青

海鳥飛處白雲天盡頭相逢問前路明日是滄州

宿德州

今夜客中宿德州城外船山東餘土俗薊北少風煙軍
饋交相集舟行不可前時聞羸老語菜熟是豐年

期筠心不至

消息渾難定先生故不來眼花空對燭心渴已生埃白
髮天誰管青山路有媒此生真昨夢隨意且銜杯

遊靈巖謁杜清獻公讀書處

今名杜家村

欲飛神不住未到眼光明山豈過江好心終背郭清村
名猶杜曲相紫自端平再拜吾何敢淒然愧後生

謁忠文先生追次先生舊韻

太息青巖老當年此灌畦渭車方入卜周道已興西嚙
雪終辭漢封茅不到齊惟餘文塚在千古說幽栖

謁樓桑廟

倉皇衣帶詔辛苦武鄉侯西蜀分王地中山奮跡秋蛟
龍曾失勢魚水故相投千載英雄淚還同沛水流

曉泊西郭

西郭舟初泊東方日未明
荒村無犬吠古寺有鐘聲
潮落夜歸海江空秋滿城
故鄉南望處漸見白雲橫

瓊島春雲

蓬海分明在眼中暖雲高捧玉芙蓉
春陰欲下清虛殿朝彩先浮最上峰
瑤管聲中迷去鶴金根影裏護雙龍
夜來雨過知多少試向東郊問老農

寄城南諸友

十年回首論交地萬地間情入望初
闕下每聞鄉國事
燈前重簡故人書紅塵滿路看羸馬
芳草經春想舊廬
出處祇今何處是欲從南谷問華胥

過歌風臺

臺下殘碑手重摩腐儒千載此經過
諸生未識叔孫禮
遊子還從父老歌日落五陵無舊樹
風來泗水有餘波
神騅不逝空成泣走狗猶存奈爾何

十五叔父在金陵有約還家舟中奉懷

去年相約及春歸
春到淮南尚客衣
一路風光看欲徧
隔江消息報來稀
渡頭芳草驚新夢
竹下清陰想舊扉
先後到家那可問
倚蓬終日雁南飛

喜陳儒珍來過

一住休言十日餘
幾從門下望高車
殷勤豈是愛留客
寥落近來成索居
莞海秋風人去後
巴山夜雨夢回初
多情見說城南路
楊柳千行綠漸疎

奉十五叔父夜話有感

竹邊飯罷酒停斟漫擁寒爐坐夜深慷慨共談當世事
依稀多愧古人心孤懷耿耿乾坤窄短髮參參歲月侵
欲上南山望湖海不知明日是晴陰

次儒珍韻

十年海嶺經行處往事多從夢裏違黑髮交情今日在
紅塵世路幾人歸屋頭流水有深淺門外青山無是非
楊柳東風零落盡松陰不改舊柴扉

春愁

獨上高樓望眼開
春愁無數逐人來
官河二月冰初合
水國經年雁未回
歧路關心妨斥堠
野田生事入蒿萊
何須更問門前柳
深放黃金作酒杯

新寒

十月風高冷欲凝
近陽樓閣怯先登
渾河水落初嘗騎
漕驛星馳已報冰
上將驅虜還筆札
內庭恩渥但金繒
深愁薄力知何賴
濁酒新寒漫不勝

病起

病起風光四月過蕭蕭雙鬢不知皤驚心午飯還宜粥
入眼春衫盡換羅筋力轉妨騎馬怯路歧生見出門多
百年夢覺今如此一笑青山奈爾何

送秦太守廷韶

江湖姓字十年期雅韻清懷衆所知念我故非萍水合
對君真重竹林思郎官歲久猶為郡刺史名高不在詩
南去邵陵應咫尺甘泉春老有新枝

曰川席上分韻得林字

主情珍重十分深
酒債詩盟許重尋
此日開軒留客意
當年虛席待君心
看山未擬懷西郭
伐木如聞在遠林
最是舞雩風日好
幾時歸詠聽餘音

與師召過北海子因憶賓之相約不果

鳥外青山宿雨過
馬頭西望鬱差峩
煙光欲墮連雲起
秋色平分隔水多
歧路有情方坎壈
客心無賴益蹉跎
歸來莫怪相期晚
不出從嗔奈爾何

送吳元玉冬官還南都

相思何夕此相逢又報離筵郭外供客路交期驚晚合
馬頭詩興及春濃星辰夜靜勞瞻夕江海風高憶住冬
安得湖州千韞絹贈君東去寫吳淞

次韻胡憲副廷慎彭城夜話之作

長憶蘇家好弟兄夜牀聽雨復寒城一時會合真難事
千古風流尚此情碣嶺北來雲作陣桓山東去石為塋
青樽落日無窮恨又是陽關第幾聲

次韻賓之遊海印寺

海子橋邊路入塍
桔槔亭外石懸藤
馬頭碧水如迎客
郭裏青山亦占僧
問舊未須驚世改
倦遊空自憶吾曾
天台雁宕平生興
却怪年來總未能

陵祀次李侍講贈行韻

諸陵王氣與天通
唐漢分明在下風
輦路夜深聯隧道
寢園春近接離宮
水聲直過龍河北
山勢遙臨碣石東
聖德皇恩今億載
豈勝淒感月明中

次韻楊維立編修與兄維貞侍御侍班述懷之

作

禁鼓初嚴曉促班
佩聲遙在殿中間
雁行側立參差地
龍袞前瞻咫尺顏
五色雲中通御氣
九重天遠隔塵寰
官曹舊接鳴珂里
幾聽前呵擁馬還

清明謁陵次楊學士維新韻

四廟衣冠尚袞龍
英靈千載此攸鍾
遺弓欲泣荆湖鼎
斬板殊深夏屋封
漢寢自應傳百代
秦泉何必鑄三重
白頭官監勞供奉
晨鼓初停又暮鐘

好景分明畫不成
題今日僕須更路從險處行來穩
山到深時望却平
花氣暖催春日轉
樹聲寒帶朔風鳴
向來奔走偷閒地
始覺官曹分外清

萬馬爭羣氣欲酣
歸鞭遙指路東南
月低淺水寒生練
露下空山夜滴嵐
遠近雞聲催曉漏
微茫人語識鄉談
天涯歲歲逢寒食
故國誰同掃墓菴

雨中次黃汝彝韻

往事分明夢裏真
路歧辛苦為誰頻
雨聲徹夜將辭曉

花意逢秋不及春
白髮漸生今日恨
青山無復舊時人
西風莫更還多事
愛送悲歌易水濱

除夕小盡立春有感

病來酷愛青山好
老去難爭白髮催
生怪月當除夕小
多情春與隔年來
榮華不駐風前蠟
消息空傳隴上梅
四十九年真昨夢
壯心剛說未成灰

再次賞菊韻一首贈四叔父

幾見東風換物華
平章宅裏是誰家
自憐天與冰霜骨

不向春爭富貴花老去有香終不俗
栽時無地且教賒
獨傷采掇非今日秋滿南山恨未涯

瀑布

李白平生不到處
巨那抵死來相看
龍湫下激噴晴雪
巖雨倒飛生畫寒
怒聲奔海直欲到
清氣逼人那可干
惡詩莫問誰堪洗
戰馬屯兵血未乾

望雁湖再次前韻

雁湖高處不勝舟
見說諸天在上頭
定有樓臺非世界

更無花木亦春秋談空謾憶三生在飛錫終堪一到休
不識閭丘蓬島外幾人曾伴赤松遊

齋居有懷諸同年

十載重來兩鬢霜直廬原是舊齋房相看敢作忘言地
不寐翻思少日狂燈燭影憐生死恨路歧辛苦夢魂妨
覺來忽報趨朝鼓又是披衣一日忙

謁李先生墓

十里驚沙郭外風亂雲回首是江東半生分已天教病

一慟誰期此拜公淚盡西州人共老夢深遼海夜難終
祇應萬古豐碑在盛德殊恩總化工

二月望日雪

朝罷歸來背客眠馬頭春色轉堪憐隨陽錯報經年雁
剝雪猶深二月天驚犬吠人疑北越凍雷崩石憶西川
閉門只合頻呼酒莫問霜毛白滿顛

宿劉諫議祠有感諸公壁間之作

漏轉山城獨坐遲一燈明滅幾停吹齋心儼覺神如對

春夢空憐夜作期五度客來須笑我百年人在定應誰
壁間敢恨題名晚淺薄終慚諫議祠

至長陵望茂陵有感

北門誰築此幽都形勝天門絕代無四塞山河歸一統
萬年陵寢壯雄圖夢驚清蹕還馳道痛憶遺弓在鼎湖
望斷六龍新蛻地九疑何處是蒼梧

候祀諸陵

寂寥風色夜淒淒寢殿門深接御堤九陛神靈天陟降

五陵燈火路東西
星辰影動千官合
松柏聲寒萬馬嘶
奔走小臣今白髮
報恩無地獨含悽

得家書有感

忽報寒梅隴上枝
馬頭風色暮春時
青山自信今猶昨
白髮休疑我是誰
門祚光華諸弟在
宦途情緒病妻知
夢魂夜夜南飛雁
莫遣平安誤作期

約西厓遊西山

百年消息此塵寰
一笑紛紛幾觸蠻
身正健時須載酒

興堪春盡也登山是誰白髮能容老何處黃金得買閒
十載江南回首地夢魂猶在有無間

悲秋

坐看明月下西樓不斷砧聲萬里愁長夜可應誰待旦
老年今已怯悲秋極知世故皆黃葉故向人生怨白頭
青海碧山無恙在也須慚愧此盟鷗

病中不及預同年會東席上諸公

三百人中今十人回頭二十七年春蘧蘧枕畔夢未覺

落露天邊星已晨病來苦恨路歧隔歡在且教樽酒頻
勲名鏡裏各自愛莫問誰家髮似銀

秋色

曉露枝頭半夕霏近人秋色故依依小窻得此已非俗
荒徑待茲胡不歸晚節有情看歲月春風何意入芳菲
無絃別是琴中趣莫向東籬問白衣

次吳匏菴原博過西苑韻

平步分明是絕塵十洲深處渺無津漏聲晝下通西掖

御氣秋高薄紫宸
天上風光元隔別
夢中歧路幾紛綸
極知供奉非前度
白髮重來愧小臣

七月廿一日留別陳太常先生

去年八月二日到
未到今年八月歸
白頭自愛此身在
清世敢言吾道非
鄉井夢隨多病苦
江湖心與故交稀
相逢莫問尊鱸興
不待秋風已拂衣

湯婆次韻

老來無復念專房
淨掃蛾眉只素粧
提甕未能忘出汲

抱衾空自熱中腸
守宮分在寧隨例
團扇恩深不怯藏
一點貞心祇如水
詎妨人世幾炎涼

盆荷

倚徧虛欄看小荷
曉缸分漲碧生波
參差出水雨聲急
次第著根秋意多
白髮偶同君子愛
畫船休唱越溪歌
獨憐玉井非吾地
十丈花高奈爾何

願學繼休期登高以病不至

咫尺登臨路未通
百年能幾嘯歌同
興猶未敗催租雨

病忽先驚落帽風，悵望祇應慚地主。
遭逢何故怨天公，定知不負青山約。
黃菊秋深正滿叢。

留別蓬萊館

病骨經秋未覺輕，幾從鄉夢數歸程。
可應金馬門無路，似與蓬萊館有情。
塞雁風高天色改，庭梧葉墮旅魂驚。
一方留滯真堪笑，三見初弦海月生。

遊戒珠寺有感

劫火光寒射戒珠，右軍亭館迹全蕪。
墨池春盡誰深淺，

筆塚秋高半有無往事謾勞千載念浮生共是百年圖
不知采叢興邦後禾黍離離幾故都

過金華諸郡有感

伏枕經秋得暫還可堪歧路轉間關無端更歷三秋路
不厭頻看兩浙山卿味漸知鱸膾美客愁難減鬢毛斑
聖恩舊識深如海便合從茲謝世艱

次韻憶戴安州

兩度河間有報書安州不見駕來車興知王子殊非淺

迹在韋郎本不疎
未必老逾相別後
可應難是入官初
十年離恨長安地
尚憶趨庭有伯魚

送鄭大尹還天台

天台作縣比神仙
好客仍兼鄭老賢
桐栢宮中春載酒
石梁橋上夜忘眠
別來最是塵埃苦
老去還于水石偏
此日送君重有感
不堪歸思益茫然

楊太真

春老華清宴門深
羯鼓聲新臺高百尺
不見范陽兵

題便面

舊業留芳徑間雲度遠岑溪橋回首處應悔出山深

小景二絕句

招招隔岸舟我心行且畏豈不念遠遊渡頭風穩未
向月援鳴琴悠然憩山趾古調今不諧含情付流水

題魏冢宰送張縣丞詩

尚書歸去鬢如蓬桃李門牆想舊容不識春風行樂地
多情還到博陵松

次偶珍韻

高秋林下相逢日猶憶天台道上詩
莫向樽前易離別
歸來已是十年期

偶為

冀北近來風土別一冬和氣滿郊畿
去年記得江南路
凍雨瀟瀟雪亂飛

除夜

暗裏年光此黑頭
落花無計水東流
誰將多事分年歲

添得今宵一倍愁

春旦

誰家池館愛逢新
滿地笙歌過路塵
幾日東風在楊柳
長安門外未知春

春雪

二月東風翻作凍
兩年春意臘前歸
越中兒女燕中長
不識今朝是雪飛

次韻題便面小景

空江收網雨收蓑忽聽中流欸乃歌莫是晚來風色好
片帆歸去已無多

長信詞

芍藥春深映曲欄海棠枝上雨初殘合歡扇在君須記
莫放秋風一夜寒

天台道中

出門一笑欲褰衣華頂峯頭半落暉怪殺平生山水癖
隔溪燈火夜深歸

二月廿七日登總山有感

花落春歸可奈何
白頭清淚幾滂沱
總山不是西州路
敢作羊曇醉後過

宿華嚴寺有感

又作華嚴寺裏眠
一燈無寐故依然
誰知五度經行客
白髮相看四十年

過白溝河有感

山後山前十六州
坐輸天險竟誰收
過河漫作千秋恨

狼籍曾聞在白溝

雨中有懷古直

醉裏乾坤不記年
忽聞多病亦淒然
可應寂寂青燈地
誰共呻吟對雨眠

石倉歷代詩選卷三百九十五